

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
KANTONALNI SUD U ZENICI**

**P R A V I L N I K
o reprezentaciji i poklonima**

Zenica, mart 2015. godine

Na osnovu člana 31 stav 1 Zakona o sudovima u Federaciji Bosne i Hercegovine ("Službene novine Federacije Bosne i Hercegovine" broj 38/05, 22/06, 63/10, 72/10 i 7/13, 54/14), a u vezi sa članom 16 Uredbe o reprezentaciji i poklonima („Službene novine Zeničko-dobojskog kantona“, broj 5/14), predsjednica Kantonalnog suda u Zenici, d o n o s i

PRAVILNIK o reprezentaciji i poklonima

DIO I-OPĆE ODREDBE

Član 1. (Predmet Pravilnika)

(1) Ovim Pravilnikom o reprezentaciji i poklonima (u daljem tekstu: Pravilnik) reguliše se visina sredstava reprezentacije za tekuću budžetsku godinu, način korištenja budžetskih sredstava namijenjenih za usluge reprezentacije, procedura i pravila primanja i davanja poklona i vođenje evidencije o primljenim poklonima u Kantonalnom sudu u Zenici.

Član 2. (Pojam reprezentacije i poklona)

(1) u smislu ovog Pravilnika, reprezentacija je izdatak koji se javlja u toku redovnog poslovanja Suda, sa ciljem ostvarenja i održavanja poslovnih odnosa, te obilježavanja godišnjica i drugih značajnih događaja.

(2) Sredstava za reprezentaciju su sredstva za troškove jela, pića i osvježenja koja se služe tokom radnih sastanaka, troškovi kupovine cvijeća i vjenaca i druge robe, prigodni pokloni zaposlenicima suda prilikom odlaska u penziju, usluge smještaja u smještajnim objektima i druge usluge.

DIO II-VISINA SREDSTAVA REPREZENTACIJE I POKLONA

Član 3. (Određivanje visine reprezentacije)

(1) Ukupan iznos izdataka za reprezentaciju (ugošćavanje, pokloni i sl.) za tekuću budžetsku godinu u Kantonalnom sudu u Zenici (u daljem tekstu: Sud) utvrđuje se u iznosu od 1.000,00 KM.

DIO III-KORIŠTENJE SREDSTAVA REPREZENTACIJE

Član 4. (Vrste reprezentacije)

(1) Sredstva reprezentacije utvrđuju se kao:

(a) **eksterna reprezentacija** koja podrazumjeva korištenje ugostiteljskih usluga u zemlji i inostranstvu od strane Suda, van službenih prostorija ili u službenim prostorijama kada se radi o organizaciji svečanih prijema, poslovnih sastanaka i drugih događaja za institucije i

organizacije na nivou Bosne i Hercegovine, entiteta, drugih kantona, općine i Brčko Distrikta Bosne i Hercegovine.

(b) interna reprezentacija podrazumjeva korištenje sredstava reprezentacije za tople napitke i bezalkoholna pića prilikom obavljanja redovnih poslova u Sudu.

Član 5.
(Korištenje sredstava reprezentacije)

(1) Predsjednik suda koristi sredstva reprezentacije razumno i primjereno, vodeći računa o raspoloživim sredstvima reprezentacije.

Član 6.
(Korištenje sredstava eksterne reprezentacije)

(1) Korištenje sredstava eksterne reprezentacije mora biti razumno i primjereno, vodeći računa o uslovima i prilikama te o statusu lica, a može se koristiti u inostranstvu, u samom sjedištu Suda i na teritoriji Bosne i Hercegovine.

(2) Pravdanje korištenja sredstava eksterne reprezentacije u inostranstvu vrši se uz podnošenje izvještaja uz koji se prilaže odgovarajući račun potpisan od strane korisnika reprezentacije.

Član 7.
(Korištenje sredstava interne reprezentacije)

(1) Interna reprezentacija odnosi se na korištenje sredstava reprezentacije za tople napitke i bezalkoholna pića prilikom obavljanja redovnih poslova u Sudu.

(2) Interna reprezentacija odnosi se i na korištenje sredstava reprezentacije prilikom održavanja Kolegija i sastanaka u Sudu.

Član 8.
(Lica s pravom korištenja sredstava za reprezentaciju)

(1) Pravo na reprezentaciju iz člana 5 ovog Pravilnika imaju Predsjednik suda kao i osobe koje on ovlasti.

DIO IV-PROCEDURE I PRAVILA PRIMANJA I DAVANJA POKLONA

Član 9.
(Primanje poklona)

(1) Predsjednik suda i sudija mogu primiti simboličan poklon, nagradu ili korist, u skladu sa prilikom u kojoj se oni daju, pod uslovom da se taj poklon, nagrada ili korist ne mogu opravdano smatrati za pokušaj uticanja na sudiju u obavljanju sudijske funkcije ili na drugi način stvarati utisak u javnosti o pristrasnosti sudije.

(2) Predsjednik suda i sudija ne smije zadržati poklon koji nema značaj poklona iz stava 1 ovog člana.

Član 10.
(Primjena Pravilnika)

(1) Zaposlenicima suda nije dozvoljeno primanje poklona od trećih osoba.

DIO V-EVIDENCIJA PRIMLJENIH POKLONA

Član 11.
(Vođenje evidencije primljenih poklona i utvrđivanje vrijednosti)

(1) Sud je dužan voditi evidenciju primljenih poklona koji nemaju značaj poklona iz člana 9 stav 2 ovog Pravilnika.

(2) Evidencija primljenih poklona sastoji se od sljedećih rubrika :

- a) redni broj,
- b) podaci o poklonodovcu, potpis poklonoprimca ili lica ovlaštenog za čuvanje poklona,
- c) vrsta, količina i vrijednost poklona,
- d) datum i mjesto prijema poklona,
- e) mjesto gdje se čuva primljeni poklon.

(3) Vrijednost poklona u smislu ovog člana utvrđuje Sud na osnovu računa, provjerom vrijednosti istog ili sličnog poklona na tržištu ili izjavom poklonodavca koja može biti usmena ili pismena, ali ne i posebno zahtijevana.

(4) Primljeni prirodni pokloni će se knjižiti na isti način kao što se knjiže primljene donacije.

(5) Operativni rad oko primanja, zavođenja, procesuiranja i čuvanja svih narudžbenica, računa i druge prateće dokumentacije u vezi sa reprezentacijom i poklonima, obavljat će računovodstvo Suda.

Član 12.
(Stupanja na snagu)

(1) Na sve što nije regulisano ovim Pravilnikom primjenjivat će se odredbe Uredbe o reprezentaciji i poklonima („Službene novine Zeničko-dobojskog kantona“ broj:5/14).

(2) Ovaj Pravilnik stupa na snagu danom donošenja, a prestaje da važi Pravilnik o reprezentaciji i poklonima Kantonalnog suda u Zenici broj: 004-0-Su-06-001 490 od 22.09.2006 godine.

Broj: 004-0-SuDp- 15- 000 322

Zenica, 23.03.2015. godine



Predsjednica suda

Snježana Čolaković